

Aalisarnermut aningaasaliissutitut immikkoortitat pillugit Inatsisartut inatsisaat nr. xx, xx 2006-imeersumut siunnersuut

Kapitali 1

Aalisarnermik aningaasaliinernut immikkoortitanik pilersitsineq

§ 1. Inatsisartut inatsisaata siunertaa tassaavoq aalisarnermik inuussutissarsiortut ineriartornerinut siuarsarnerinullu tapiissuteqarnissaq, ilanngullugu inuussutissarsiummi peqataasunut nutaanut isersinnaanerup ajornanninnerulernissaa. Inatsisartut inatsisaat aalisarnermik inuussutissarsiorderup inuiaqatigiinni sapinngisamik annertunerpaamik iluanaaruteqarnissaanut peqataassaaq ilanngullugu aalisarnermi naammassisaqarsinnaassuseq, unammillersinnaassuseq aamma aalisakkanik pisuussutitik aalisarsinnaassutsip ingerlaavartumik naleqqussarsinnaanera pitsaanerulersillugu kiisalu kalaallit nunaanni aalisarnermut iluaqutaasumik nutarsaanerit siuarsarlugit.

Imm. 2. Aalisarnermut aningaasaliissutitut immikkoortitat Aningaasanut inatsimmi immikkoortinneqassapput aamma Aalisarnermut Aningaasaliissutitut Immikkoortitani ileqqaarneqarlutik.

Kapitali 2

Inatsisip atuuffia

Ingerlaavartumik taarsersuinernut nutarterinernullu tapiissutit

§ 2. Naalackersuisut sinerissami qanittumi aalisariutit teknikkikkut pisoqaassutsikkullu ajorsiarturnerat malillugu ingerlaavartumik taarsersornerannut nutarternerannullu tapiissuteqarsinnaapput.

Imm. 2. Taamaallaat tapiissuteqartoqarsinnaavoq angallatinik nutaanik atornikunillu pisinernut inuussutissarsiordermi atorneqarsinnaasutut akuerisaasunut aammalu siunissami sivisunerusumi aalisarsinnaalluassuseq ingerlatiinnarumallugu aalisarsinnaalluurtutut nutaaliaasutullu nalilerneqartunut.

Imm. 3. Imm. 1 malillugu sinerissap qanittuani aalisarnermi aalisariutitik ingerlaavartumik taarsersuinermi nutarterinermilu ilaapput teknikkikkut atortut, sillimaniarnermi atortut, teknikkikkut atortut allat, aalisarnermi atortut atortullu tamakku assigisaat, suliniullu piviusun-ngortinniarlugu teknikkikkut aningaasatigullu pisariaqartumik siunnersorneqarneq.

Suliniutinut nutarterisunut tapiissutit

§ 3. Kalaallit Nunaata aalisarnikkut pisuussutaanik ineriartortitsineranut taakkuninngalu atuinermut iluaqutaasutut nalilerneqartunut ingerlatsinissamut, Naalakkersuisut misiliutigalugu nutaanik suliniutinik pilersitsineranut, misileraalluni aalisarnernut assigisaasaluunniit, naammassineqarnissaannut tapiissutinik tunniussisinnaapput, uku ilanngullugit:

- 1) Imartap aalisarnikkut periarfissaanik, immikkut aalisagaqarneranik aamma aalisarnerup allanngortinneqarsinnaaneramik periarfissanik misissuineranut.
- 2) Aalisarnermi atortunik pitsanngorsaaneq naammassisaqarnerulersitsinerlu, aalisariaatsinik allanik misileraaneq sungiusarnerlu.
- 3) Ataavartitsiniarluni suliniutinik killilersuinermilu periutsinik misileraanerit, ilanngullugit aalisarnermi atortunik immikkoortiterisinnaasunik qajassuussisinnaasunillu inerisaaneq misileraanerlu.
- 4) Aningaasaqarnikkut iluanaaruteqarnerup pitsaanerulernissaa siunertaralugu tunisassianik aamma tunisassioriaatsinik pioreersunik inerisaaqqinneq pitsanngorsaanerlu.
- 5) Aalisakkanik tukertitsivinnik pilersaarusiornissamut misissuinerit ineriartortitsinermilu suliniutit.

Kapitali 3 *Qinnuteqaatit*

Qinnuteqaatit imaat

§ 4. §§ 2 aamma 3 naapertorlugit tapiiffigineqarnissamut qinnuteqaammi suliniummik aallaserisaq ukuninnga imalik ilanngunneqassaaq:

- 1) Pilersaarutip siunertaanik isumaanillu nalunaarut.
- 2) Ingerlatsinermi aningaasaqarnermilu missingersuutit tapiiffigitinnissamut pisariaqartinneqartut annertussusiinik nalunaarut.
- 3) Suliniummi peqataasunik piginnittunillu tamanik nalunaarut.
- 4) Suliniummik aqutsineq aqutsisullu pisinnaasaannik allaaserinnineq.
- 5) Suliniutip naammassineqarnissaanut piffissaliussaq.
- 6) Teknologi, atortut, tunisassiornermi atortut angallallu atorineqartussaq pillugit pingaarnersiorlugit allaaserisaq.
- 7) Pilersaarummi tunisassianik tunitsiviit aqutiginneqartussat pillugit nalunaarut.

Qinnuteqaammi uppernarsaatinut piumasagaatit

§ 5. §§ 2 aamma 3 naapertorlugit tapiiffigineqarnissamik qinnuteqaammut uppernarsaatit ilanngunneqassapput, taassuma ataani ukununnga uppernarsaatit:

- 1) Pisassiissutinut, aalisarsinnaaneranut akuersissutinut imaluunniit akuersissutinut pisariaqartunut piumasagaataasooq inatsit una malillugu aningaasatigut tapiiffigineqarnissaq.
- 2) Avataanit atortitsisartut aningaasaliisinnaaneranikk neriorsuut imaluunniit pilersaarutip aningaasartuutitassai tamarmiusut eqqarsaatigalugit §§ 7, imm. 1

- aamma § 8 imm. 1 malillugit nammineq aningaasaliisinnaaneq.
3) Suliffeqarfimmik isumaqatigiissutinillu tassunga atasunik piginnittuuneq.
4) Inuussutissarsiornermut pisortaniit taarsigassarsiat.

Kapitali 4

Tapiissutininik tunniussineq

§ 6. § 2 malillugu tapiissutininik qinnuteqaatip nalilersornerani, suliniut tamaat isigalugu nalinginnaasumik aningaasatigut angusassatut ilimagineqarsinnaasut allaavigalugit Naalakkersuisut suliniummik naliliissapput.

Imm. 2. § 3 malillugu tapissutininik qinnuteqaatip nalilersornerani, suliniut tamaat isigalugu suliniummi pineqartumi siunissami kalaallit aalisarnermi inuussutissarsiorneranni periarfissatut ilimagineqarsinnaasut aallaavigalugit Naalakkersuisut nalilersussapput.

Imm. 3. Naalakkersuisut §§ 2 aamma 3 malillugit tapiissutisissamik qinnuteqaatit nalilersornerini, ilaatigut qinnuteqartoq siusinnerusukkut tapiissutisissimanersoq, siusinnerusukkut tapiissutisinermi piumasaqaatinik sumiginnaasimanersoq, imaluunniit pisortanit inuussutissarsiutinut taarsigassarsianik sumiginnaasimanersoq pingaarutilittut nalilersinnaavaat.

§ 7. § 2 malillugu Naalakkersuisut ukununnga tapiisinnaapput:

- 1) Raajarniarnermi pisinermi nalingata tamarmiusup 10%-ia tikillugu.
- 2) Raajat saniatigut aalisarnermi allani pisinermi nalingata tamarmiusup 20%-ia tikillugu.

Imm. 2 Imm.1 malillugu pisinermi nalinganut tamarmiusumut ilaapput:

- 1) Angallat teknikkikkut pisariaqartunik ikkussuiffigineqarsimasoq.
- 2) Isumannaallisaanermi atortut.
- 3) Teknikkikkut ikkussukat allat.
- 4) Aalisarnermi atortut assigisaallu ingerlatsinermit atortut allat.
- 5) Suliniutip naammassineqarnissaanut teknikkikkut aningaasaqarnikkullu siunnersuinerit pisariaqartut.

Imm. 3. Imm. 1 apeqqutaatinnagu Qaanaamut, Ittoqqortoormiinit aamma Ammassallip kommuniinit tapiissutit annertussusissaat aamma tapiissuteqarnissami piumasaqaatit pillugit immikkut ittunik Naalakkersuisut malittarisassaliorsinnaapput.

§ 8. § 3 malillugu suliniutinut nutarterisunut Naalakkersuisut tapiisinnaapput suliniummi aningaasartuutit 50%-ii tikillugit.

Imm. 2. Imm. 1 malillugu suliniummi aningaasartuutinut ilaapput:

- 1) Misissuinerit.
- 2) Pisiat, kisiannili tassunga ilaanatik angallatit, illut atortullu aalajangersukat allat.
- 3) Teknikkikkut, aningaasatigut biologinillu siunnersorneqarnerit.

Nammineq aningaasaliissutit

§ 9. Naalackersuisut tapiisinnaapput piumasaralugu qinnuteqartup nammineq aningaasaliissutini uppersarsassagai.

Imm. 2. Nammineq aningaasaliissutitut isigineqarput:

- 1) Aningaasat tigorianaat.
- 2) Pigisat § 7, imm. 2 malillugu pisianut tamarmiusunut ilaasut.
- 3) Pigisat § 8, imm. 2, nr. 2 malillugu suliniummi aningaasartuutitut ilaasut.

Tuniseqqinnermi piumasaqaateqarneq

§ 10. Naalackersuisut tapiissuteqarsinnaapput piumasaralugu angallat imaluunniit suliniummi pigisat angallatip imaluunniit suliniummi pigisat tunniunneqareerneranniit ukiuni qulini siullerni tunineqannginnissaat.

Naalackersuisut qinnuteqartoqareerneratigut tapiissutit utertillugit akilerneqareernerisigut tunisinissaq akuerisinnaavaat.

Imm. 2. Kisiannili Naalackersuisut akuersissutigisinnaavaat tapiiffigineqartup angallat suliniummilu pigisat tunisinnaagai, piginnittoq nutaaq § 4 malillugu tapiiffigineqarnissamut piumasaqaatit naammassippagit suliniummillu allaaserinninnermik nassiussippat aamma § 5 malillugu uppersarsaatinik nassiussippat.

Imm. 3. Imm. 2 malillugu angallammik suliniummilu pigisanik tunisinnermi tapiinnermi piumasaqaatit allannngortinnagit ingerlaqqissapput. Tapiinnermi piumasaqaatit piginnittup nutaap akuerissavai.

Uppersarsaaneq

§ 11. Naalackersuisut tapiissutininik tiguisoq uppersarsaatinik tunniussinissamik piumasaqaateqarfigisinnaavaat, taassuma ataani ukununga uppersarsaatit:

- 1) Suliniummi aningaasaqarneq, taassuma ataani aningaasartuutit suut suliniutip piviusun-ngortinnerani aningaasartuutaasimanersut.
- 2) Suliniummi tunisassianit aningaasat isertitat.
- 3) Tuniseqqissinnaanermi piumasaqaatit atuutsillugit ukiumoortumik naatsorsuutit.

Kapitali 5

Tapiissutininik utertitsilluni akiliineq

§ 12. Tapiissutit utertillugit akilerneqarnissaannik Naalackersuisut piumasaqarsinnaapput, ukununga pisoqarpat:

- 1) Tapiissutininik tiguisoq qinnuteqarnermini pingaarutilinnik eqqunngitsunik paasisutissiisimappat.
- 2) Tapiissutininik tiguisoq § 11 malillugu peqqussutininik nalunaarutigineqartunik malinnin-ngippat.
- 3) Tapiissutininik tiguisoq suliniutip ingerlanneqarnerani

piviusunnngortinneqarneranilu aammalu suliffeqarfimmik pitsaasumik ingerlatsinermit atuuttunik annertuumik sumiginnaappat.

4) Tapiissutit tigusisoq tapiinermi piumasaqaatinik atugassaqaartinneqartunillu sumiginnaappat.

§ 13. Tapiissutit utertillugit akilerneqarnissaat Naalakkersuisut piumasarisinnaavaat, imatut pisoqarpat:

- 1) Tapiissutit tigusisoq ingasattumik sumiginnaasimaneq pissutigalugu akiliisinnaajunnaartutut nalunaarutigineqarpat.
- 2) Tapiissutit tigusisup pilersaarut tuneqqissimappagu.
- 3) Suliniut tapiiffigineqartoq ingerlatsiveqatigiiffimmit allamit tigueqarpat imaluunniit piumasaqaatini tunngavigineqartut sinnerlugit pilersaarummut tunngatillugu piginnittuusut annertuumik allanngorpata.
- 4) Tapiissutit tigusisoq aalisarsinnaanermut akuersissummi piumasaqaatit imaluunniit aalisarnermi suliniummilluunniit pisortat akuersinermi piumasaqaataannik naammassisinnaajunnaarpat.

Kapitali 6

Ataatsimut aalajangersakkat

§ 14. Tapiinermi allaffissornermilu ingerlatsinermit malittarisassanik Naalakkersuisut aalajangersaasinnaapput, taassuma ataani:

- 1) Suliniutit suut tapiiffigineqarsinnaanersut.
- 2) Nunap sortaani tapiissuteqartoqarsinnaanersuq.
- 3) Inuussutissarsiutit immikkoortut suut tapiiffigineqarsinnaanersut.
- 4) Qinnuteqartumut suliniummullu ilinniagaqarnikkut, aningaasaqarnikkut teknikkikkullu piumasaqaatit.

Kapitali 7

Pineqaatissiisutit

§ 15. Ukuninnga pisoqartillugu pillaammik akiliisitsoqarsinnaavoq:

- 1) Pissutsinik § 12 malillugu tapiissutit utertitsilluni akiliinissamik kinguneqartumik unioqutitsineq.
- 2) Pisortanut salloqittaalluni paasissutissiineq, takuuk § 4.
- 3) § 11-imi piumasaqaatit aalajangerneqarsimasut sumiginnarneqarsimappata.
Imm. 2. Suliffeqarfik tamakkiisumik ilaannakortumilluunniit naalagaaffimmit, Namminer-sornerullutik Oqartussanit pigineqartoq, kommune imaluunniit kommunimi ataatsimoorussaq kommunalbestyrelsit aamma nunaqarfinni aqutsisut il.il. pillugit inatsisartut inatsisaasa ataaniittoq, aktieselskabi, anpartsselskabi, andelselskabi assigisaalluunniit unioqutitsippata suliffeqarfik assigisaallu pinerlunnermi inatsisit naapertorlugit akisussaatinneqarsinnaavoq. Tamannattaq atuuppoq Namminersornerullutik Oqartussanit, kommunimit imaluunniit kommunimi ataatsimoorussamit kommunalbestyrelsit aamma nunaqarfinni aqutsisut

il.il. pillugit inatsisartut inatsisaasa ataaniittumit unioqqutitsineq
iliuserineqarsimappat.

Imm. 3. Inatsit manna malillugu malitarrisassani aalajangersarneqarsinnaavoq
malittarrisassanik unioqqutitsineq akiliisitsinermik kinguneqarsinnaasoq.

Imm. 4. Malittarrisassani Inatsisartut inatsisaat manna malillugu
aalajangersarneqartuni suliffeqarfik tamakkiisumik ilaannakortumilluunniit
naalagaaffimmit, Namminersornerullutik Oqartussanit pigineqartoq, kommune
imaluunniit kommunimi ataatsimoorusaq kommunalbestyrelsit aamma nunaqarfinni
aqutsisut il.il. pillugit Inatsisartut inatsisaasa ataaniittoq, aktieselskabi,
anpartsselskabi assigisaalluunniit unioqqutitsippata suliffeqarfik assigisaallu
unioqqutitsineranni pillaammik akiliisitsinissaq pillugu malittarrisassanik
aalajangersaasoqarsinnaavoq. Aammattaaq Namminersornerullutik Oqartussat,
kommune imaluunniit kommunimi ataatsimoorusaq kommunalbestyrelsit aamma
nunaqarfinni aqutsisut il.il. Inatsisartut inatsisaasa ataaniittoq unioqqutitsisillugit
pillaammik akiliisitsinissaq pillugu malittarrisassanik aalajangersaasoqarsinnaavoq.

Atuutilerfia

§ 16. Inatsisartut inatsisaat manna 1. januar 2007-miit atutilissaaq.

Namminersornerullutik Oqartussat, ulloq xx.xx 2006

Hans Enoksen

/

Finn Karlsen